

**TITAH**  
**KEBAWAH DULI YANG MAHA MULIA PADUKA SERI BAGINDA**  
**SULTAN HAJI HASSANAL BOLKIAH MU'IZZADDIN WADDAULAH IBNI**  
**AL-MARHUM SULTAN HAJI OMAR 'ALI SAIFUDDIEN SA'ADUL KHAIRI WADDIEN, SULTAN**  
**DAN YANG DI-PERTUAN NEGARA BRUNEI DARUSSALAM**

**SEMPENA**  
**UPACARA SOVEREIGN'S PARADE**  
**PENGAMBILAN KE DUA PULUH DUA**  
**SEKOLAH PEGAWAI KADET,**  
**AKADEMI PERTAHANAN**  
**ANGKATAN BERSENJATA DIRAJA BRUNEI**

**PADA HARI KHAMIS**  
**20 REJAB 1445 / 01 FEBRUARI 2024**

**BERTEMPAT**  
**PADANG KAWAD AKADEMI PERTAHANAN**  
**ANGKATAN BERSENJATA DIRAJA BRUNEI**  
**KAMPUNG TANAH JAMBU**

Assalamu'alaikum Warahmatullahi Wabarakatuh

Bismillaahir Rahmaanir Raheem

Alhamdulillah Rabbil 'Alameen, Wabihee Nasta'eenu 'Alaa Umuuriddunya Wadden, Wassalaatu' Wassalaamu 'Ala Asyarafil Mursaleen, Sayyidina Muhammaddin, Wa'ala Aalihee Wasahbihee Ajma'een, Waba'du.

Segala puji dan syukur ke hadhrat Allah *Subhanahu Wata'ala* kerana dengan izinNya jua, dapatlah kita sama-sama hadir bagi Upacara *Sovereign's Parade* Pengambilan Ke Dua Puluh Dua (22), Sekolah Pegawai Kadet, Akademi Pertahanan, Angkatan Bersenjata Diraja Brunei.

Beta terlebih dahulu dengan besar hati mengucapkan syabas dan tahniah kepada Lima Puluh Empat (54) orang Pegawai Kadet atas persembahan perbarisan yang kemas dan penuh semangat sebentar tadi. Beta yakin ini adalah hasil latihan yang berjaya oleh Pegawai-Pegawai Kadet yang telahpun bersedia dengan penuh yakin untuk memulakan kerjaya sebagai Pegawai Tentera bertauliah Angkatan Bersenjata Diraja Brunei.

Beta gembira dan bangga dengan perkembangan positif Sekolah Pegawai Kadet sejak penubuhannya lima belas (15) tahun yang lalu, iaitu untuk julung kalinya telah menerima penyertaan bersejarah dua (2) orang Pegawai Kadet, masing-masing dari Angkatan Tentera Malaysia dan Angkatan Bersenjata Republik Singapura.

Beta juga gembira mengambil maklum, bahawa sehingga kini, Sekolah Pegawai Kadet telahpun berjaya melahirkan seramai 804 orang Pegawai Tentera yang bertauliah. Sesungguhnya pencapaian yang signifikan ini adalah bukti jelas meningkatnya kredibiliti dan kematangan Sekolah Pegawai Kadet sehingga turut disambut baik oleh negara-negara sahabat. Syabas, Beta ucapkan kepada Sekolah Pegawai Kadet ABDB.

Sebagai satu-satunya institusi pendidikan dan latihan pegawai-pegawai tentera di negara ini, maka amatlah mustahak bagi Akademi Pertahanan untuk mengekalkan peranan utamanya selaku organisasi yang menjana perkembangan profesionalisme Pegawai-Pegawai ABDB melalui dasar *Professional Military Education Manual 2023* yang telah diterbitkan baru-baru ini. Beta yakin Akademi Pertahanan adalah mampu untuk membantu ABDB merangka pelan pendidikan dan latihan sebagai langkah melahirkan pemimpin yang mempunyai ilmu akademik ketenteraan yang tinggi, yang berpaksikan falsafah Melayu Islam Beraja disamping memperkasa Nilai-Nilai Teras ABDB yang memartabatkan identiti kebruneian.

Dalam hubungan ini, Beta dengan sukacita menyambut baik dan memperkenankan rancangan Akademi Pertahanan untuk menubuhkan *Faculty of Military Studies* dengan kolaborasi bersama Universiti Brunei Darussalam. Ini adalah merupakan langkah positif dan salah satu inisiatif untuk mendapatkan pengiktirafan pendidikan *Professional Military Education* dan adaptasi konsep *Lifelong Learning*.

Fakulti ini membuka ruang bagi Pegawai-pegawai ABDB untuk mengikuti program *Bachelor in Defence and Security Studies* yang diperolehi bermula dari Peringkat Kursus Pegawai Kadet sehingga ke peringkat Kursus Staf Pertengahan atau *Intermediate Staff Course* dan seterusnya, *Master Degree in Defence and Security Studies* di peringkat Maktab Turus ABDB. Beta menaruh keyakinan, segala bentuk perancangan dan usaha baik ini Insya Allah akan tercapai dengan dukungan serta kerjasama kukuh dari semua pihak yang berkenaan.

Beta juga sukacita mengucapkan syabas di atas pencapaian Pegawai-pegawai ABDB yang telah meraih anugerah tertentu di Institusi Pendidikan tentera Luar Negara seperti di Maktab Turus Republik Singapura dan Australia serta Kursus Pegawai Kadet Tentera laut di Britannia Royal Naval College, Dartmouth, United Kingdom baru-baru ini. Ucapan Tahniah juga untuk enam (6) orang Pegawai ABDB yang telah menerima anugerah *OBOE Endeavour Academic Excellence* daripada Kerajaan Australia sebagai pengiktirafan terhadap pencapaian cemerlang mereka di dalam Kursus Maktab Turus ABDB baru-baru ini.

Akhirnya, Beta sukacita merakamkan ucapan terima kasih dan setinggi-tinggi penghargaan kepada seluruh warga Akademi Pertahanan, khususnya kepada Komandan Akademi Pertahanan, Pegawai Pemerintah, Pegawai-Pegawai, *Colour Sergeant*, Jurulatih dan Kakitangan Sekolah Pegawai Kadet di atas pengorbanan serta dedikasi mereka dalam melatih dan mendidik Pegawai-pegawai Kadet dan menjayakan Upacara *Sovereign's Parade* pada pagi ini.

Ucapan terima kasih dan penghargaan juga, Beta tujukan kepada para ibu bapa, penjaga serta ahli keluarga di atas suntikan semangat, bimbingan dan sokongan yang berterusan sehingga mereka berjaya mengharungi latihan yang sangat bermakna dan mencabar ini. Kepada semua Penerima Anugerah tertentu, Beta ucapkan tahniah dan syabas.

Dengan merafakkan syukur ke hadhrat Allah *Subhanahu Wata'ala* dan dengan berkat kalimah ***Bismillahir Rahmanir Rahim***, Beta dengan sukacita mengurniakan Tauliah kepada Lima Puluh Empat (54) orang Pegawai Kadet, Pengambilan Kedua Puluh Dua (22).

Sekian, Wabillahit Taufeq Walhidayah, Wassalamu 'Alaikum Warahmatullahi Wabarakatuh.